

E lo no retira di politica:

Arondino Croes: hermentnan pa Presidente di Parlamento dirigi reunion ta limita

ORANJESTAD (AAN) – Den entrevista cu Parlamentario Independiente drs. Arondino Croes, cu a dispidi diaranzon for di e funcion aki, el a duna su comentarionan na Matutino DIARIO.

Parlamentario drs. Arondino Croes a menciona cu el a bay tres temporada caba den Parlamento pa un total acumula di cuater aña.

Parlamentario Arondino Croes a señala cu ora e partido den cual e ta milita no ta na mando e tarea ta hopi mas dificil cu si e ta den gobierno.

El a indica cu den un partido chikito manera nan tabata di cinco asiento, e trabao ta mas pisa pero esaki ta un reto, unda mester demostra su habilidadnan y capacidad como parlamentario.

El a señala cu e no ta bay retira di politica. Pero pa e biaha aki ta cerando e capitulo como miembro di Parlamento, pero den futuro unda cu e por aporta e lo haci esey.

El a gradici henter e staf di Parlamento, e griffiernan y Presidente di Parlamento (saliente) y e pueblo di Aruba cu a dune e oportunidad di represente den Staten den tres oportunidad. Esaki tabata tres experiencia diferente pero hopi constructivo, di cual el a siña hopi y cu a yude grandemente.

Algo cu e kier mira cambia den Parlamento y cu e ta considera e parti mas central, ta con e reunionnan ta wordo guia unda cu e ta kere cu e instrumentnan cu e Presidente tin pa haci esaki ta limita.

Na su opinion mester instala un comision pa studia e posibilidad di introduci na Aruba un sistema similar na esun di Inglatera. Esaki ta un procedimiento con pa hiba palabra, cu ta trece mas orden, eficacia y eficiencia, y cu lo hisa e nivel di calidad.

E ta exige di e miembronan di Parlamento pa nan forma nan mes riba e aspectonan aki y tin institutonan local cu ta duna curso di Sistema Parlamentario, y e tema aki el a trece dilanti caba den Parlamento, prome y durante su despedida.

El a agrega cu e forma di atende cu e reglamento verordening mester wordo adapta, profundiza, amplia y

diversifica y bay den tur su esencianan chikito. Eynan lo mira un cambio drastico, aunke logicamente comportacion ta keda na cada ken, pero e ta duna Presidente di Parlamento e mecanismo pa e por actua y corta e oranan di reunion pero cu eficiencia.

El a señala cu personalmente el a hiba un bon relacion cu tur su coleganan di Parlamento, semper el a percura pa saluda

nan, pa hiba su discursonan na nivel, y e ta sinti cu el a gana e respet di e demas miembronan di Staten.

El a evita tur tipo di confrontacion personal, locual a yuda grandemente y esey ta un conseho cu e tin pa e parlamentarionan nobo, pa purba mantene nan opinion riba maneho y contenido y no cay den tentacion a base di atakenan personal.

